

## **SA PERDA DE SA BREGÙNGIA**

Acanta de sa Pratzza de Santa Luxia, anca atòbiant sa Bia Tuveri e sa Bia Principessa Maria ddoi est sa perda de sa bregùngia.

Segundu is contus de sa genti de sa bidida, custa perda fintzas a acabai su 1800 fiat posta in mezu a unu spratzinu mannu e serbiat po sbregungiri sa genti chi cumitiat unu reatu.

Po nai, a is tempus nci fuant is barracellus chi candu agatant unu pastori pascendi a pascolu abusivu una terra de un'àteru, o agatant mancai unu furendi unu cuaddu, ma non ddu bolliant denunciai a sa giustìtzia, ddu sbregungiant una borta sètziu inguni, acanta a sa perda.

Parit chi donessint sa grida e narant :“cras faci a is dexi in sa perda de sa bregùngia ddoi at unu chi dd'ant agatau pascendi a pascolu abusivu...”, chentza de fai su nòmini. Aici sa genti cun su disìgiu de sciri chini fessit, andat a sa perda a ddu biri. Una borta arribaus, ddu sbregungiant cun fueddus lègius.

Me in is annus '50 prus o mancu, candu s'est decidu de asfaltai sa strada, s'impresa chi depiat fai is traballus nd'at tirau sa perda de anca fut e dd'at posta acanta de una domu. Annus infatu perou cussus chi biviant inguni, iant bòfiu inghitzai àterus traballus e is maistus de muru chi ddus depiant fai iant pigau custa perda ca strubat, dd'iant segat e dd'iant fulliat in mesu a is fundamentas de sa domu chi fiant fendi.

S'interventu de un'òmini de sa bidida chi biviati inguni acanta e si fiat acatau de custu dannu, at permiu de ndi torrai a pigai sa perda e de dda ponni anca est imoi, gràtzias puru a s'aministratzioni comunali de is tempus.

Tempus fait unu baruminesu chi biviati in custu bixinau etotu, iat prantau acanta de sa perda una mata de acàcia. Sa mata est crèschia bella arta, fadiat umbra e bogat froris profumaus puru. E sempri de cussu chi narat sa genti de bidida, parit chi medas pipius ddoi gioghessint a giru a giru.

Imoi sa perda non tenit prus sa bisura chi teniat prima. Oi est arrèschia in su ciumentu e a giru a giru tenit unus cantu de matonis arrùbius.